

2.3. JISMONIY SHAXSLARNING DAROMAD SOLIG'I

Singapurda ham jismoniy shaxslar o'z daromadidan soliq to'laydi. Singapur davlatida jismoniy shaxslar rezident yoki rezident emasligiga ko'ra turli soliq to'lash mexaniz-miga duch keladilar. Umumiy konsepsiyaga ko'ra norezi-dentlar rezidentlardan ko'ra ko'proq soliq to'lashiga to'g'ri keladi. Lekin bunda xalqaro shartnomalar amal qilishi ham istisno qilinmaydi.

2.3.1. REZIDENTLIK MAQOMI

Jismoniy shaxs tegishli hisobot yili uchun rezident hisoblanadi, agar:

1. Singapur fuqarosi bo'lsa yoki Singapurda doimiy yashovchi bo'lsa.

2. Chet el fuqarosi o'tgan kalendar yilda kamida 183 kun Singapurda yashasa/ishlasa.

3. Chet el fuqarosi ketma-ket 3 yil Singapurda yashasa/ishlasa.

4. Chet el fuqarosi ikki yil davomida kamida 183 kun Singapurda yashasa/ishlasa. Mazkur qoida kompaniya direktorlari, san'atkorlar va professionallarga amal qilmaydi.

Kamida 1 yil muddatga amal qiladigan ish ruxsatnomasi berilgan chet ellik jismoniy shaxslar ham soliq rezidenti hisoblanadi. Biroq ularning soliq rezidentligi maqomi ish faoliyati tugaganda soliq hisob-kitobi jarayonida soliq rezidentligi qoidalari asosida qayta ko'rib chiqiladi. Agar ularning Singapurda yashash/ishlash muddati 183 kundan kam bo'lsa, ular norezident shaxs hisoblanadi.

Singapurda rezidentlikni aniqlash maqsadlarida ish kunlari sanog'iga hafta oxiri va davlat bayram kunlari ham kiradi. Singapurdan vaqtincha chiqishlar (masalan, chet elga dam olishga ketish) yoki ishga bog'liq safarlar (masalan, biznes safarlari) soliq rezidentligi maqomini aniqlash maqsadida umumiy ish kunlari hisobiga kiritiladi.

Shuningdek, rezidentlikni aniqlashning sifatga oid testi ham mavjud. Bunda jismoniy shaxsning Singapurda ya-

shash/ishlash muddati emas, Singapurga boshqa jihatdan bog'liqligi hisobga olinadi. Quyidagi omillar shaxsning Singapur rezidenti ekanini aniqlashda yordam beradi:

- Shaxsning Singapurda oilaviy aloqalari bor-yo'qligi;
- Shaxsning Singapurda turarjoyi bor-yo'qligi;
- Shaxsning Singapurga vaqtincha maqsadlarda kelgan-kelmagani;
- Shaxsning Singapurda doimiy yashash joyi mavjudligi;
- Singapurga tashriflarning chastotasi, muntazamligi va davomiyligi hamda bunday tashriflarning maqsadi.

Soliq rezidenti bo'lishning afzalligi

Soliq rezidenti sifatida jismoniy shaxslar:

- Singapurda olgan barcha daromadlari uchun soliq to'laydilar;
- Ularning xorijiy manbalardan olgan daromadlari (Singapurdagi sherikchilik orqali olinganlardan tashqari) Singapurga olib kelinganda soliqdan ozod qilinadi;
- Ular xarajatlar, xayriya va imtiyozlar bo'yicha chegirmalar olishlari mumkin.



Soliq rezidentlarining ruxsat etilgan xarajatlar, xayriya va imtiyozlar chegirilgandan keyingi daromadlari 0% dan 24% gacha bo'lgan progressiv stavkalar bo'yicha daromad solig'iga tortiladi. O'zbekistonda faqat bitta 12% stavka amal qiladi.

Rezidentlikni aniqlash bo'yicha misollar

1-misol: Kalendar yilida Singapurda kamida 183 kun yashagan yoki ishlagan

Siz Singapurda 2024-yil 1-apreldan 3-oktyabrgacha (186 kun) yashadingiz. 2025-yilgi soliq baholash yili uchun soliq rezidenti hisoblanasiz.

2-misol: Singapurda ketma-ket 3 yil yashagan yoki ishlagan

Siz Singapurda 2022-yil 3-noyabrdan 2024-yil 7-maygacha yashadingiz yoki ishladingiz. 2023-yildan 2025-yilgacha bo'lgan soliq hisoboti yillari uchun soliq rezidenti hisoblanasiz.

3-misol: 2 yil davomida uzluksiz ravishda kamida 183 kun Singapurda ishlagan

Siz Singapurda 2023-yil 3-noyabrdan 2024-yil 7-maygacha ishladingiz (2 yil davomida uzluksiz ravishda kamida 183 kun). 2024- va 2025-yillardagi soliq yillari uchun soliq rezidenti hisoblanasiz.

Norezidentlarni soliqqa tortish

Singapurning rezidenti bo'lmagan shaxs Singapurning norezident shaxsi hisoblanadi.

Norezident sifatida jismoniy shaxs:

- Singapurda olgan barcha daromadlari uchun soliq to'laydi;
- U soliqni kamaytirish uchun xarajatlar va xayriya bo'yicha chegirmalar olishi mumkin. Biroq **imtiyozlarga da'vo qila olmaydi**;

– Uning ish haqi daromadiga quyidagilardan yuqorisi bo'yicha soliq solinadi:

1. 15% qat'iy stavka.
2. Progressiv rezident soliq stavkalari.

– Direktor uchun to'lovlar, maslahatchi to'lovlari va boshqa barcha daromadlarga odatda 24% da soliq solinadi.



O'zbekistonda norezident jismoniy shaxslar xuddi Singapurdagi kabi imtiyozlardan foydalanmasa ham, Singapurda farqli ravishda barcha daromadlari uchun (dividend, foiz va fraxt daromadlari mustasno) 12% stavkada soliq to'laydi. Bu degani O'zbekistonda jismoniy shaxsning rezident yoki norezident bo'lishi unchalik katta ahamiyatga ega emas.

Qisqa muddatli ish (60 kun yoki undan kam)

Agar siz rezident bo'lmasangiz va Singapurda yiliga 60 kun yoki undan kam ishlagan bo'lsangiz, qisqa muddatli ish haqi daromadingiz soliqlardan ozod qilinadi. Bu qoida, agar siz **boshqaruv kengashi direktori, san'atkor** yoki Singapurda **professional** sifatida to'lov olsangiz, amal qilmaydi. Professionalarga chet ellik ekspertlar, chet ellik spikerlar, maslahatchilar, trenerlar, murabbiylar va boshqalar kiradi.

Ikki tomonlama soliq solishning oldini olish shartnomalari

Ikki tomonlama soliq solishning oldini olish shartnomalari orqali bir xil daromad uchun ikki marta soliq solinish-

dan himoyalaniishingiz mumkin. Ikki tomonlama soliq solish bir xil daromadga ikki marta soliq solinganda yuz beradi: bir marta daromad olingan yurisdiksiyada va ikkinchi marta u olingan yurisdiksiyada. Yurisdiksiyalar ikki tomonlama soliq solishning ta'sirini kamaytirish uchun ikki tomonlama shartnomaga kirishadi. Faqat Singapur va tegishli xalqaro sherikning soliq rezidentlari ushbu shartnoma normalaridan foydalanishlari mumkin.

Xalqaro shartnoma ostidagi imtiyozlar

Xalqaro shartnoma qoidalariga bog'liq ravishda siz shaxsiy xizmatlar, o'qituvchilar, tadqiqotchilar, san'atkorlar, sportchilar, talabalar, stajyorlar va boshqalar uchun daromad bo'yicha soliqdan ozod bo'lishingiz mumkin.

Singapur soliq rezidentlari

Agar Singapur fuqarosi boshqa mamlakat/yurisdiksiyadan daromad olsa, u yerda soliqqa tortilishi mumkin. Biroq ushbu fuqaro xalqaro shartnomadagi imtiyozlarga da'vo qilishi mumkin. Bu imtiyozdan foydalanish uchun fuqaro Singapur soliq rezidenti ekanini isbotlash maqsadida chet el soliq organiga rezidentlik sertifikatini taqdim qilishi kerak. Rezidentlik sertifikati bu fuqaroning Singapurda soliq rezidenti ekanini tasdiqlovchi xatdir.

2.3.2. DAROMAD SOLIG'INI HISOBLASH TARTIBI

Daromad solig'i hisoboti quyidagi ko'rsatkichlardan iborat bo'ladi:

No	Ko'rsatkichlar	Formula
1	JAMI DAROMADLAR, jumladan	XXX
1.1.	<i>Ish haqi</i>	XXX
1.2.	<i>Ijara daromad</i>	XXX
1.3.	<i>Biznes daromadi</i>	XXX
1.4.	<i>Dividend va foizlar</i>	XXX
2	XAYRIYA UCHUN CHEGIRMALAR	(XXX)
3	BAHOLANADIGAN DAROMAD	3=1-2
4	QO'LLANADIGAN IMTIYOZLAR	(XXX)
5	SOLIQ SOLINADIGAN DAROMAD	5=3-4
6	Soliq stavkasi	Progressiv/15%/24%
7	SOLIQ SUMMASI	7=5*6

1. JAMI DAROMADLAR

Bunga jismoniy shaxs o'zi ishlab topgan barcha ish haqi daromadlari, foizlar, dividendlar, ijara daromadi, o'zini o'zi band qilgan shaxs sifatida yoki sherikchilikdan topilgan foyda kiritiladi.

3. BAHOLANADIGAN DAROMAD

Jismoniy shaxs o'z daromadlaridan xayriyaga yo'naltirgan bo'lsa, bu xayriya summaları odatda 2,5 koeffitsiyentda jami daromaddan chegiriladi va baholanadigan daromad chiqadi.

5. SOLIQ SOLINADIGAN DAROMAD

Baholanadigan daromaddan jismoniy shaxsga nisbatan qo'llanadigan imtiyoz summalari ayrilsa, soliq solinadigan daromad hosil bo'ladi.

7. SOLIQ SUMMASI

Mazkur ko'rsatkich soliq solinadigan daromadga progressiv soliq stavkasini qo'llash orqali hisoblanadi. Singapur progressiv shkalasini qo'llashni o'rganish ham biroz diqqat va sabrni talab qiladi.

2.3.3. DAROMAD SOLIG'I STAVKASI

2024-yildan boshlab quyidagi progressiv stavka amal qilmoqda:

	Soliq solinadigan daromad	Soliq stavkasi (%)	To'lanadigan soliq summasi
Dastlabki	20 000	–	0
Keyingi	10 000	2	200
Dastlabki	30 000	–	200
Keyingi	10 000	3,5	350
Dastlabki	40 000	–	550
Keyingi	40 000	7	2800
Dastlabki	80 000	–	3350
Keyingi	40 000	11,5	4600
Dastlabki	120 000	–	7950
Keyingi	40 000	15	6000
Dastlabki	160 000	–	13 950
Keyingi	40 000	18	7200
Dastlabki	200 000	–	21 150
Keyingi	40 000	19	7600
Dastlabki	240 000	–	28 750
Keyingi	40 000	19,5	7800
Dastlabki	280 000	–	36 550
Keyingi	40 000	20	8000
Dastlabki	320 000	–	44 550
Keyingi	180 000	22	39 600
Dastlabki	500 000	–	84 150

Keyingi	500 000	23	115 000
Dastlabki	1 000 000	–	199 150
...dan ortig'i	1 000 000	24	

Bu progressiv stavka qanday qo'llanadi? Agar e'tibor bilan qaralsa, mazkur jadval soliqni hisoblash uchun juda qulay shaklda tuzilgan. Unda yillik daromadni soliqqa tortish foizlari ko'rsatib o'tilgan. Masalan, yillik daromadi 20 ming dollargacha bo'lgan jismoniy shaxslar nol stavkada soliq hisoblaydi. Keyingi 10 ming dollargacha bo'lgan qismga 2% soliq hisoblanadi.

1-misol. A jismoniy shaxs 2024-yilda 25 ming soliqqa tortiladigan daromadga ega. Ushbu daromad summasiga nisbatan stavkani qo'llasak, dastlabki 20 ming uchun nol stavka, qolgan 5 ming uchun 2% stavka qo'llanadi. Demak, soliq summasi 100 dollarni tashkil etadi.

2-misol. A jismoniy shaxs 2024-yilda 140 ming dollar soliqqa tortiladigan daromadga ega bo'lgan. Yuqoridagi shkalada «Dastlabki» deb boshlanuvchi satrlarda soliq summasi kumulyativ tarzda hisoblab qo'yilgan. Masalan, 140 ming dollardan kichik bo'lgan «Dastlabki 120 ming dollar uchun» soliq summasi 7950 dollar, keyingi 20 ming uchun esa 15% stavkada soliq hisoblaymiz. Jami to'lanadigan soliq summasi **10 950 dollar (7950+20 000*15%)** bo'ladi.

2.3.4. DAROMAD TURLARI

Jismoniy shaxslar oladigan daromadlarni bir nechta guruhlarga bo'lish mumkin. Xususan:

- Yollanib ishlashdan daromadlar;
- Biznes va savdodan daromadlar;
- Mulklardan daromadlar;
- Boshqa manbalardan daromadlar.

Quyida har bir toifa daromadlar haqida batafsil tushuncha berib o'tamiz.

2.3.5. Yollanib ishlashdan daromadlar

Xodim sifatida ish joyidan olingan barcha daromadlar uchun odatda soliq solinadi. Maosh ish beruvchiga xodim sifatida ko'rsatilgan xizmatlar uchun olingan to'lov (naqd yoki boshqa shaklda)ni anglatadi.

Bonuslar

Ish joyidan olinadigan bonusga soliq solinadi. Bonuslar shartnomaviy yoki noshartnomaviy bo'lishi mumkin.

Shartnomaviy bonus xizmat shartnomasi shartlariga muvofiq to'lanadi va ish beruvchi tomonidan huquqiy oqibatlersiz olib tashlanishi mumkin emas. Shartnomaviy bonusga misollar: 13-oylik to'lov yoki yillik ish haqi qo'shimchasi. Shartnomaviy bonus uchun shartnoma yoki bonus rejasida ko'rsatilgan yilda bunday bonusga haqli bo'lasiz. Bu odatda xizmat ko'rsatilgan yildir. Masalan, meh-

nat shartnomangizda ko'rsatilganidek, 2024-yil 31-dekabr bilan tugaydigan yil uchun shartnomaviy bonus (masalan, 13-oylik bonus) oldingiz, u 2025-yil fevralda to'landi. Bu shartnomaviy bonus uchun 2024-yil uchun soliq hisobotida soliq solinadi, chunki bonus 2024-yildagi xizmatlaringiz uchun to'langan.

Agar ish beruvchining bonus to'lash majburiyati kelajakda bajarilishi kerak bo'lgan shartlarga bog'liq bo'lsa, siz faqat shu shartlar bajarilganda bonusga haqli bo'lasiz. Masalan, A ish beruvchi 2023-yil 31-dekabr bilan tugaydigan yil uchun xodimlarga shartnomaviy bonus rejasini joriy qildi. Xodim bonus rejasida quyidagi shartlar belgilangan:

- Bonus 2024-yil 31-martda to'lanadi;
- 2024-yil 31-martgacha ishdan bo'shagan xodimga bonus to'lanmaydi.

Xodim Li Tan 2024-yil 15-yanvarda iste'fo haqida xabar berdi. Shuning uchun u bonusga haqli emas. Boshqa xodimlar ikkala shartni bajarganda bonusga haqli bo'ladilar. Bu shartnomaviy bonusga 2024-yil soliq hisobotida soliq solinadi, chunki shartlar faqat 2024-yilda bajarilgan.

Noshartnomaviy bonus

Noshartnomaviy bonus degani ish beruvchi uni bonus haqiqiy to'lanishidan oldin har qanday vaqtda huquqiy oqibatlersiz olib tashlashi yoki bekor qilishi mumkinligini ang-

latadi. Bunday bonus xodim to'lovga haqli bo'lganda soliq solinadi. Odatda bu bonus to'langan sana muvofiq tarzda soliq hisobotiga kiritiladi. Masalan, A ish beruvchi 2023-yil 1-dekabrda xodimlariga 2023-yil 31-dekabr bilan tugaydigan yil uchun noshartnomaviy bonuslarni 2024-yil 1-fevralda to'lash qarori haqida xabar berdi. Xodimlar bunday noshartnomaviy bonuslarga 2024-yil 1-fevralda bonuslar to'langanda haqli bo'ladilar. Xodimlar 2023-yil hisobotida emas, balki 2024-yil hisobotida ushbu bonusga soliq to'laydilar.

Soliqqa tortiladigan boshqa ish haqi daromadlari

- Transport to'lovi, ovqat to'lovi va boshqa shu kabi to'lovlar;
- Ish beruvchingiz tomonidan to'lov o'rniga berilgan klub a'zoligi kabi natural naflar;
- Singapurda bajarilgan ish uchun Singapurdan tashqari-da tuzilgan pensiya/pensiya fondiga ish beruvchi tomonidan qilingan badallar, garchi badallar qilingan vaqtda Singapurda ishni tugatgan bo'lsangiz ham;
- Erta iste'fo yoki shartnomaning erta bekor qilinishi uchun kompensatsiya sifatida ogohlantirish o'rnidagi maosh/ogohlantirish to'lovi;
- Ish beruvchi tomonidan to'langan jismoniy shaxs solig'i
- ish beruvchingiz tomonidan to'liq yoki qisman to'langan soliq.

Soliq solinmaydigan boshqa ish haqi daromadlari

№	Imtiyoz turi	Tushuntirish	Shartlar
1	Xodimlar o'rtasida do'stlikni mustahkamlovchi imtiyozlar		
	a) Guruhli dam olish (chet elga sayohat subsidiyasidan tashqari)	Barcha xodimlarga mavjud bo'lishi kerak	Barcha xodimlarga tegishli
	b) Oilaviy festival		
	d) Korporativ kechki ziyofat (sovg'alar va lotereya sovrinlari bilan)		
	e) Ijtimoiy yoki dam olish obyektlari (bepul yoki subsidiya bilan)	Sport zallari, sport maydonlari, dam olish uylari	Klub a'zoligiga tegishli emas
	f) Korporativ sovg'alar (krujka, futbolka)		
	g) Bepul yoki subsidiyali oziq-ovqat		
	h) Uydan ishga bepul transport		
	i) Singapurdagi diqqatga sazovor joylarga korporativ biletlar		
2	Sog'liq bilan bog'liq imtiyozlar		
	a) Ambulator davolash	Faqat xodim, turmush o'rtog'i va bolalar uchun	Barcha xodimlarga mavjud
	b) Kasalxonada davolash		
	d) Stomatologik xizmat		
3	Ijodkorlik va innovatsiyani rag'batlantiruvchi imtiyozlar		
	a) Xodimlar taklifi mukofoti	Hukumatning innovatsiya dasturiga mos	

	b) Sifat guruhi mukofoti		
4	Malaka oshirish uchun imtiyozlar		
	a) Kurs to'lovlari subsidiyasi	Xodimlarni rivojlantirish dasturi	Barcha xodimlarga mavjud
	b) Trening to'lovlari		
	d) Stipendiya mukofotlari		
	e) Imtihon to'lovlari		
5	Maxsus holatlar uchun sovg'alar		
	a) Tug'ilgan kun, nikoh, bola tug'ilishi, vafot	200 dollargacha soliqsiz	Vafot uchun chegarasiz
	b) Bayram sovg'alari (Yangi yil)	200 dollardan oshsa, butun summa soliq solinadi	
6	Bolalar bog'chasi subsidiyasi	Litsenziyali bolalar bog'chalari uchun	
7	Vafot, nogironlik, ishchi kompensatsiyalari		
8	Klub a'zoligi		
	a) Korporativ klub a'zoligi kirish to'lovlari	Xususiy klublar uchun	
	b) Ishchi maqsadlar uchun klub a'zolik to'lovlari	Mijozlarni mehmon qilish uchun	
9	Guruhli tibbiy sug'urta badali	Barcha xodimlarga mavjud bo'lishi kerak	
10	Foizsiz yoki subsidiyali kreditlar		
	a) Uy krediti	Barcha xodimlarga mavjud	Hissador bo'lmalik kerak
	b) Avtomobil krediti		

	d) Kompyuter krediti		
	e) Ta'mir krediti		
	f) Shaxsiy kredit		
11	Ish uchun texnika	Noutbuk, planshet, telefon	Faqat rasmiy maqsadlar uchun
12	Mukofotlar		
	a) Pensiyaga chiqish mukofoti (naqd bo'lmagan)	200 dollargacha simvolik	
	b) Uzoq xizmat mukofoti (naqd bo'lmagan)	200 dollardan oshsa, butun summa soliq	
	d) Xizmat yaxshiligi mukofoti	200 dollargacha soliqsiz	
	e) Kasallanmaganlik mukofoti		
	f) Imtihondan o'tganlik mukofoti		
13	Xodimlar formasi	Majburiy ish talabi va korporativ stil uchun	
14	Kechki ish ovqati imtiyози	Rasmiy soatlardan tashqari ish uchun	Doimiy oylik to'lovlarga soliq solinadi
15	Transport to'lovlari		
	a) Uchrashuv va mijozlarga borish xarajatlari	Rasmiy vazifalar uchun	Doimiy oylik to'lovlarga soliq solinadi
	b) Kechki ish transport to'lovi	Zarurat tufayli	
	d) Chet elga ishchi safar uchun aeroport transporti		
	e) Ishchi uchrashuvlar uchun transport		
16	Tijorat transporti haydovchilari uchun	Mototsikl, furgon, yuk mashinasi haydovchilari	Uyga borish-kelish

17	Xodimlar chegirmasi	500 dollargacha soliqqa tortilmaydi	Barcha xodimlarga mavjud
		500 dollardan oshsa, butun chegirmaga soliq solinadi	Oila a'zolari ham foydalanishi mumkin

Bu yerda bepul oziq-ovqat berilishi barcha xodimlar uchun ta'minlansa, bunday oziq-ovqat jismoniy shaxsning daromadi sifatida qaralmasligi ta'kidlanmoqda.

Pensiya daromadlari

Pensiya daromadlari xodimlar pensiya yoshiga yetganda oladigan nafaqa va boshqa to'lovlardir. Singapurdagi pensiyalarga oid yozma qonunlar (Pensiya qonuni, Singapur qurolli kuchlari qonuni va Parlament pensiya qonuni) ostidagi hukumat pensiya sxemalaridan olingan pensiya daromadlariga soliq solinmaydi.

Ishdan bo'shatish kompensatsiyasi

Kompaniyani qisqartirish yoki qayta tashkil etish tufayli xodimga to'lanadigan ishdan bo'shatish kompensatsiyasi soliqqa tortilmaydi. Xodim o'z ixtiyori bilan ishdan ketganda to'lanadigan mukofotlar xodimning ilgari ko'rsatgan xizmatlarini e'tirof etish maqsadida beriladi, shuning uchun ish haqi daromadi sifatida soliq solinadi.

2.3.6. BIZNES VA SAVDODAN DAROMADLAR

Singapurda jismoniy shaxslar yuridik shaxs tashkil qilmagan holda ham biznes bilan shug'ullanishlari mumkin. Buning ikki usuli bor. Biri – o'zini o'zi band qilgan shaxs. Ikkinchisi – sherikchilik.

O'zini o'zi band qilgan shaxslar

O'zini o'zi band qilgan shaxslar – savdo, biznes, kasb yoki faoliyat bilan shug'ullanib kun kechiradiganlar. Masalan, enaga, sug'urta agenti, frilanser. Ular o'z biznes faoliyatidan olgan daromadlarini maosh emas, balki biznes daromadi sifatida hisobga olishlari kerak. Bu daromad jami daromadning bir qismi bo'lib, daromad solig'i progressiv stavkalariga tortiladi.

Ish haqi tarzidagi daromadlar uchun soliq davri kalendar yil bo'lsa, biznes daromadi uchun soliq davri moliyaviy yil hisoblanadi. Singapurda moliya yili biznes subyekti tomonidan tanlanadi. Masalan, bu moliyaviy davr 1-iyuldan 30-iyungacha bo'lgan muddatni o'z ichiga olishi mumkin. Shunga qaramay, ko'pgina o'zini o'zi band qilganlar kalendar yilni tanlaydilar. O'zini o'zi band qilganlar biznesni boshlagan sanadan e'tiboran birlamchi hujjatlarni yuritishi shart. Ular har moliya yili yakunida balans va moliyaviy natijalar to'g'risidagi hisobotni tayyorlashlari lozim.

Agar o'zini o'zi band qilgan shaxs biznesining hisob yili oktyabr, noyabr va dekabrdan boshqa oylarda tugasa va biznes aylanmasi 500 000 dollar yoki undan ortiq bo'lsa, hisob

yili tugagandan so'ng 3 oy ichida ECI (Soliqqa tortiladigan daromad bahosi) taqdim etishi zarur.

Daromadi 200 minggaacha bo'lgan o'zini o'zi band qilgan shaxslar ikki qatorli soliq hisoboti topshiradilar:

1-qator	Tushum
2-qator	Tuzatilgan foyda/zarar

Daromadi 200 mingdan ortiq bo'lgan o'zini o'zi band qilgan shaxslar to'rt qatorli soliq hisoboti topshiradilar:

1-qator	Tushum
2-qator	Yalpi foyda
3-qator	Chegiriladigan xarajatlar
4-qator	Tuzatilgan foyda/zarar

O'zini o'zi band qilgan shaxsning tuzatilgan foydasini hisoblashda chegirma berilmaydigan va qo'shib hisoblanadigan odatiy xarajatlar:

- Tadbirkorning olgan puli/maoshi – bular uning biznesdan olgan daromadi hisoblanadi;

- Tadbirkorning shaxsiy xarajatlari – bular uning biznesiga tegishli emas, masalan, o'zining tibbiy xarajatlari va uy-ro'zg'or xarajatlari;

- Kapital tabiatidagi xarajatlar/zararlar;

- Amortizatsiya – buning o'rniga kapital chegirmalar beriladi;

- Xayriya – bular biznes xarajatlari emas. Tasdiqlangan xayriya faqat savdo zararlarini qoplangandan keyin chegiriladi.

Ko'rib turganingizdek, o'zini o'zi band qilgan shaxslar foydasini hisoblashda chegirilmaydigan xarajatlar ham mavjud. Yuqoridagi hisobot shakli jismoniy shaxs soliq hisob-kitobi bo'lgani uchun soliqqa tortiladigan daromadni hisoblashda jismoniy shaxsga beriladigan imtiyozlar chegiriladi. To'lanadigan soliq rezident jismoniy shaxs uchun progressiv stavkalar asosida hisoblanadi.

O'zini o'zi band qilgan shaxs o'z faoliyatiga oid quyidagi majburiyatlarga ega:

- Daromad va xarajatlarni aniqlash imkonini beruvchi yetarli hisob-kitob hujjatlarini 5 yil davomida saqlash;
- Chek berish va nusxalarini saqlash. Agar o'tgan kalendar yilda tovar sotishi 18 000 dollardan oshsa va xizmat ko'rsatishi 12 000 dollardan oshsa, chek o'rniga kassa apparatlaridan foydalanish mumkin.

Sherikchilik

Sherikchilik foyda olish va uni o'rtada taqsimlash maqsadida biznes yurituvchi ikki yoki undan ortiq shaxs o'rtasidagi huquqiy munosabatdir. Sherikchilik qonun nuqtayi nazaridan alohida yuridik shaxs emas, shuning uchun sherikchilik o'zi olgan daromadlari uchun foyda solig'ini to'lamaydi. Buning o'rniga har bir sherik sherikchilikdan olgan daromad ulushiga daromad solig'i to'laydi.

Sherikchilik soliq to'lamasa ham, u sherikchilik tomonidan olingan barcha daromadlar va sherikchilik biznesini yuritishda qilingan xarajatlar chegirmalarini ko'rsatish uchun yillik daromad solig'i hisobotini taqdim etishi shart.

Mas'uliyati cheklangan sherikchilik (MChSh)

MChSh bizneslarga sherikchilik sifatida faoliyat yuritish imkonini beradi, lekin tashkilotga alohida yuridik shaxs maqomini beradi. MChSh qonun nuqtayi nazaridan «yuridik shaxs» hisoblanadi.

Soliq maqsadlarida MChSh sherikchilik hisoblanadi, alohida yuridik shaxs sifatida emas. Buning ma'nosi shuki, MChSh o'zi soliq to'lamaydi. Har bir sherik o'zining MChSh-dan olgan daromad ulushiga soliq to'laydi. Bu soliq jismoniy shaxslarning daromad solig'idir.

Sherikchilik bo'yicha quyidagi masalani ko'rib chiqaylik.

Yeng, Bok va Lim sherikchiligining 2022-yil 30-sentyabrda tugagan yil uchun foyda-zarar hisobi quyidagicha:

Sotishdan tushum	550 000
Minus: Sotilgan tovarlar tannarxi	373 700
Yalpi foyda	176 300
Minus xarajatlar:	
Amortizatsiya	5000
Xayriya	1800
Shubhali qarzlari uchun umumiy rezerv	7900
Boshqa ruxsat etilgan xarajatlar	50 000
Jami xarajatlar	64 700
Faoliyat foydasi	111 600
Sheriklar maoshlari:	
Ko	24 000

Bok	18 000
Lim	12 000
Jami maoshlar	54 000
Kapitalga foiz:	
Ko	1200
Bok	900
Lim	1500
Jami kapital foizi	3600
Yil uchun sof foyda	54 000

Qo'shimcha ma'lumotlar:

– 2022-soliq yili uchun kapital chegirma miqdori (2.2.7-bandga qarang): \$2400

– 2022-soliq yili uchun tasdiqlangan xayriya summasi: \$1800

Sheriklarning tuzatilgan foydasini hisoblang.

Yechish:

Dastlab jami tuzatilgan foydani aniqlab olamiz:

Ko'rsatkich	Dollar (\$)	Izoh
Yil uchun sof foyda	54 000	Berilgan
Qo'shib hisoblash:		
Amortizatsiya	5000	Chegirma berilmaydi
Xayriya	1800	Chegirma berilmaydi
Shubhali qarzlarni umumiy rezerv	7900	Chegirma berilmaydi
Tuzatilgan savdo foydasi	68 700	

Minus:		
Kapital chegirma	(2400)	Ruxsat etilgan chegirma
Taqsimlanuvchi foyda	66 300	
Qo'shib hisoblash (sheriklar xarajatlari):		
Sheriklar maoshlari	54 000	Olgan pul hisoblanadi
Kapitalga foiz	3600	Olgan pul hisoblanadi
Tuzatilgan foyda	123 900	

Sheriklar teng foyda taqsimotiga ega deb faraz qilgan holda foyda taqsimoti jadvali

Foyda taqsimoti nisbati: Ko : Bok : Lim = 1:1:1 (teng taqsimot)

Ko'rsatkich	Ko (\$)	Bok (\$)	Lim (\$)	Jami (\$)
Taqsimlanuvchi foyda ulushi	22 100	22 100	22 100	66 300
Maosh	24 000	18 000	12 000	54 000
Kapitalga foiz	1200	900	1500	3600
Jami daromad	47 300	41 000	35 600	123 900

Har bir sherik o'z ulushi uchun jismoniy shaxs daromad solig'i stavkalari bo'yicha soliq to'laydi. Eski sherikchilik tugagan va yangi sherikchilik boshlangan deb hisoblanadigan holatlar:

- sherik pensiyaga chiqishi;
- sherik vafot etishi;
- yangi sherik qabul qilinishi.

2.3.7. MULKLARDAN DAROMADLAR

Singapurda jismoniy shaxslar asosan dividend, foiz, mulkni sotishdan daromad yoki ijaradan mulkiy daromadlarga ega bo'ladilar. Quyida ushbu daromad turlarini hisoblash tartibi va soliqqa tortilishini ko'rib chiqamiz.

Dividendlar

Umuman olganda, quyidagi dividendlarga soliq solinmaydi:

- Bir pog'onalik foyda solig'i tizimi ostida Singapur rezident kompaniyasi tomonidan aksionerlarga to'langan dividendlar (kompaniya tomonidan to'langan soliq yakuniy hisoblangani sababli), kooperativlardan tashqari;
- Singapurda rezident jismoniy shaxslar tomonidan chet eldan olingan dividendlar, Singapurdagi sherikchilik orqali olinganlardan tashqari.

Singapurdagi sherikchilik orqali jismoniy shaxslar tomonidan chet eldan olingan dividendlar muayyan shartlar bajarilganda soliqdan ozod qilinishi mumkin. Dividendlar aksionerlarga to'lash uchun e'lon qilingan yilda daromad sifatida hisobga olinadi.

Foizlar

Foiz banklar, moliya kompaniyalari yoki boshqa moliyaviy vositalarga qo'yilgan pullardan olinadigan daromadlardir. Quyidagi manbalardan olingan foizlarga soliq solinmaydi:

- Singapurdagi tasdiqlangan banklardagi depozitlar;

- Singapurda litsenziyalangan moliya kompaniyalaridagi depozitlar;

- Qarz qimmatli qog'ozlari (masalan, obligatsiyalar) – lekin agar bular (i) sherikchilikka tegishli bo'lsa yoki (ii) savdo biznesining zaxirasidan bo'lsa, soliq solinadi;

- Chet el manbalari (umuman olganda, chet eldagi foiz – chet el kompaniyasi yoki biznesi tomonidan to'langan foiz) – lekin sherikchilik tomonidan olingan chet el foiziga soliq solinadi. Chet el kompaniyasi yoki biznesning Singapur filiali tomonidan to'langan foiz Singapur foizi hisoblanadi.

Quyidagi manbalardan olingan foizlarga soliq solinadi:

- Singapurdagi tasdiqlanmagan banklardagi depozitlar;
- Singapurda litsenziyalanmagan moliya kompaniyalaridagi depozitlar;
- Singapurdagi lombardlar;
- Kompaniyalarga, shaxslarga va boshqalarga berilgan qarzlilar.

Mulklarni sotishdan daromadlar

Singapurda mulk, aksiyalar va moliyaviy instrumentlarni sotishdan olingan foydaga umuman soliq solinmaydi. Biroq «mulk savdosi»dan olingan foydaga soliq solinishi mumkin.

Quyidagi foydalarga umuman soliq solinmaydi:

- Singapurda mulkni sotishdan olingan foyda – kapital foydasi hisoblanadi;
- Aksiyalar yoki boshqa moliyaviy instrumentlar (raqamli tokenlarni ham) sotib olish va sotishdan olingan foyda yoki zarar – shaxsiy investitsiya deb hisoblanadi;

– Sugʻurta polislaridan toʻlovlar – kapital tushumlari hisoblanadi.

Mulkni sotishdan olinadigan soliqqa tortiladigan foyda

Agar jismoniy shaxs foyda olish maqsadida mulk sotib olib sotsa yoki mulk savdosi bilan shugʻullanayotgan deb hisoblansa, foyda soliqqa tortilishi mumkin. Jismoniy shaxsning mulk savdosi bilan shugʻullanganini baholashdagi ayrim mezonlar:

- Operatsiyalar chastotasi (mulkni sotib olish va sotish);
- Mulkni sotib olish va sotish sabablari;
- Mulkni uzoq muddat saqlash uchun moliyaviy imkoniyatlar;
- Saqlash muddati.

Ijaradan daromad

Mulkni ijaraga berishdan olinadigan daromad soliqqa tortiladi. Bunda Oʻzbekiston qonunchiligidan farqli jihat, ijara obyekti boʻyicha qilingan xarajatlar daromaddan chegiriladi.

Ijara daromadi deganda ijara obyekтини foydalanishga berish natijasida olinadigan barcha summalarni oʻz ichiga oladi. Jumladan, ijara summasi, depozit summasi, sugʻurta tomonidan qoplanishi. Ruxsat etilgan xarajatlar chegirilgandan keyingi sof ijara daromadi daromad soligʻiga tortiladi. U mulk egasiga toʻlash muddati kelganda soliq solinadi, haqiqiy olingan sanada emas.

Ijara daromadini boʻlib olish

Mulk egasi bir kishi boʻlganda jami daromadga soliq solinadi. Agar mulk bir necha kishiga tegishli boʻlsa, ijara daro-

madi barcha birgalikdagi egalarga mulkdagi qonuniy ulushlari asosida soliq solinadi. Ijarani kim olgani yoki egalar mulk uchun haq to'lagan-to'lamaganlari muhim emas. Ijara zarari ham birgalikdagi egalarga mulkdagi qonuniy ulushlari asosida taqsimlanadi. Ko'pincha er-xotin o'rtasida mulkka egalik ulushi bo'yicha shartnomaviy kelishuv bo'lmasa, ijara daromadi teng ikkiga bo'linadi.

Ijara xarajatlarini chegirish

Faqat ijara daromadini ishlab topish uchun va ijara davridagina sarflangan xarajatlar soliq chegirmasi sifatida talab qilinishi mumkin. Soliq to'lashni soddalashtirish va hujjatlar yuritish yukini kamaytirish uchun umumiy ijara-ning 15% asosida hisoblangan ijara xarajatlari summasi va mulk egalarining ijaraga berilgan mulkni sotib olish uchun olingan qarziga ipoteka foizini talab qilishlari mumkin.

Demak, ijaraga beruvchida ikki xil tanlov mavjud: haqiqiy xarajatlarni chegirish yoki jami ijara daromadining 15% va ipoteka foizlari. Ijara shartnomalari, bank ipoteka hisobotlari, inyoyslar va cheklar kabi barcha qo'llab-quvvatlovchi hujjatlarni tasdiqlash maqsadlarida kamida 5 yil saqlash lozim.

Ijara xarajatlari quyidagilardan iborat:

Xarajat turi	Ruxsat etilgan xarajatlari	Ruxsat etilmagan xarajatlari
Uy qarzlar	Ijaraga berilgan mulkni sotib olish uchun olingan qarz yoki ipotekaga to'langan foiz (kechikish foizi ham kiradi)	Asosiy qarz yoki ipoteka summasini qaytarish (oylik to'lovlar). Banklar tomonidan qarzni kechikib to'lagani uchun qo'yilgan kechikish jarimalari yoki moliya to'lovlari
Mulk solig'i	Ijara davri ichida yuzaga kelgan (masalan, 2024-yilda ijaraga berilgan mulk uchun 2024-yilga to'langan mulk solig'i)	Mulk solig'ini kechikib to'lash yoki to'lamaganlik uchun qo'yilgan jarima. O'tgan yildan qolgan mulk solig'i
Yong'in sug'urtasi	Yong'in sug'urtasiga to'langan badallar	Mulk bo'yicha kafolatlangan kapital summa
Ta'mir	Mulkni aslidagi holatiga keltirish uchun ijara davridagi ta'mir	Dastlabki ta'mir xarajatlari. Yaxshilash/qo'shimcha va o'zgartirishlarga olib keluvchi ta'mir
Texxizmat	Mulkni saqlash xarajati (masalan, bo'yoq, zararli hasharotlarga qarshi kurash, boshqaruv korporatsiyalariga oylik texxizmat to'lovlari)	Mulkni ta'mirlash, qo'shimcha, o'zgartirish xarajati (masalan, garaj qismini kengaytirish, drenaj qurish, devor va pollarni sementlash, deraza panjarasini o'rnatish)
Ijarachi topish xarajati	2022-yilgi soliq baholash yilidan: Birinchi va keyingi ijarachilar uchun ijara olish, berish, yangilash yoki uzaytirish uchun sarflangan agent komissiyasi, reklama, huquqiy xarajatlari va marka soliqlari ruxsat etiladi. Eslatma: Quyidagi hollarda chegirma berilmaydi: a) muddati 3 yildan oshadigan ijara; b) biznesni sotib olish, sotish, o'tkazish yoki qayta tashkil etish tufayli ijara; d) mulkni sotib, sotuvchiga qayta ijaraga berish	

Nazorat yoki boshqaruv to'lovlari	Uchinchi tomonni (masalan, mulk agenti/kompaniya) jalb qilish xarajati – ijara to'lovlarini o'z vaqtida to'lashni ta'minlash, mulklarni saqlash va ijarachilarning savol va shikoyatlariga javob berish	Boshqaruv to'lovi bog'liq tomonga (masalan, qarindoshlar yoki o'z kompaniya)ga to'langanda egalar to'langan summa bozor narxida va ko'rsatilgan xizmatlarga mos ekanini asoslashlari kerak
Mebel va jihozlar	Mebellarni (masalan, mebel, jihozlar, elektr buyumlari) aslidagi holatiga almashtirish. Mebel ijarasi	Mebellarning amortizatsiyasi. Mebellarga yangi yaxshilashlar/qo'shimchalar
Internet to'lovlari/xarajatlari	Ijarachi nomidan to'langan (ya'ni ijarachi tomonidan qoplanmaydigan)	Ijarachi nomidan to'langan va keyinchalik ijarachi tomonidan qoplangan
Kommunal xarajatlari	Ijarachi nomidan to'langan (ya'ni ijarachi tomonidan qoplanmagan)	Ijarachi nomidan to'langan va keyinchalik ijarachi tomonidan qoplangan
Ijara daromadi keltirmayotgan mulklar xarajati	Yo'q	Bunday mulklar bo'yicha sarflangan tegishli xarajatlar (masalan, o'z turarjoyi/bo'sh mulk uchun ijara, kommunal, texxizmat) boshqa mulklardan olingan ijara daromadidan chegirilishi mumkin emas, chunki xarajatlar kapital xarakterga ega

Keling, ijara daromadini hisoblash bo'yicha quyidagi masalani ko'rib chiqamiz.

Er-xotin janob Ali va uning rafiqasi Cove Avenue'dagi quyidagi mulkka birgalikda egalik qiladi:

Ko'rsatkich	Dollar (\$)
Oylik ijara to'lovi	12 500
Sarflangan xarajatlar:	
Mulk solig'i	7100
Texxizmat to'lovlari	26 000

Ta'mir – pechka	2100
Pardalarni almashtirish	3600
Ipoteka qarz foizi	41 000
Sug'urta – Yong'in	1000
Ijarachi uchun sotib olingan yangi idish yuvish mashinasi	4000

Qo'shimcha ma'lumot: Yangi idish yuvish mashinasi ijarachi so'ragani tufayli ijarachi uchun sotib olingan. Bundan oldin binoda ijarachi foydalanishi uchun idish yuvish mashinasi mavjud bo'lmagan.

Yechish: Dastlab yillik ijara summasini hisoblaymiz. Chunki jismoniy shaxsning daromad solig'i bo'yicha hisobot davri yil hisoblanadi. Jami ijara daromadi 150 000 dollar ($12500 \cdot 12$)ga teng. Xarajatlar summasini ikki tanlov bo'yicha hisoblash mumkin:

1. Haqiqatdagi xarajatlar summasi 80 800 dollarga teng. Bunda yangi idish yuvish uchun qilingan xarajat kapital xarakterida bo'lgani uchun chegirilmaydi.

2. 15% lik xarajat qoidasi bo'yicha 63 500 dollarga teng ($150\,000 \cdot 15\% + 41\,000$).

Ushbu xarajatlarning kattasini tanlash orqali soliq bazasini qonuniy kamaytirish mumkin. Faqat haqiqiy xarajatlarni chegirishda tasdiqlovchi hujjatlarni ko'rsatib berish lozim. Sof ijara daromad summasi 69 200 dollar ($150\,000 - 80\,800$)ga teng bo'ladi. Ushbu daromad er-xotin o'rtasida teng taqsimlangan holda ularning har biri o'z hisobotida ushbu daromad-dan soliq to'lashlari kerak.

2.3.8. XAYRIYA UCHUN CHEGIRMALAR

Singapurda kompaniyalar ham, jismoniy shaxslar ham xayriya qilishga rag'batlantiriladi. Buning uchun ular ro'yxati davlat tomonidan belgilangan ijtimoiy xarakterdagi tashkilotlarga xayriya qilgan taqdirda bu summa 2,5 ga ko'paytirilgan holda kompaniyaning yoki jismoniy shaxsning soliq bazasini kamaytiradi. Ijtimoiy xarakterdagi tashkilotlarga (IXT) ta'lim, sport, madaniyat sohalaridagi tashkilotlar kiradi. Ushbu tashkilotlar o'zlari qabul qilgan xayriya va xayriya qilgan tashkilot yoki jismoniy shaxs to'g'risida SSOga xabar beradi. Natijada xayriya qiluvchi tashkilot yoki jismoniy shaxs hisobotida avtomatik shakllanadi.

Pul mablag'lari xayriyasi

Agar jismoniy shaxs tasdiqlangan ijtimoiy xarakterdagi tashkilotga xayriya qilsa, bu xayriya soliqdan ozod qilinadi. Bunda jismoniy shaxs ushbu xayriyadan manfaat ko'rmasligi lozim. Ba'zan kompaniyalar yoki jismoniy shaxslar reklama maqsadlarida ijtimoiy xarakterdagi tashkilotlarga xayriya qiladi. Bundan ko'zlangan maqsad o'z brendlarini tanitish bo'lishi mumkin.

Aksiyalar xayriyasi

Jismoniy shaxslar Singapur birjasida savdo qilinadigan aksiyalarni ijtimoiy xarakterdagi tashkilotlarga xayriya qilishi mumkin. Aksiya qiymati ijtimoiy xarakterdagi tashkilotlar tomonidan aniqlanadi. Aksiyaning xayriya qilish sanasi aksiyaga egalik huquqi IXTga o'tgan sana hisoblanadi.

Jismoniy shaxslar yoki kompaniyalar tomonidan muzeylarga qilingan xayriyalar quyidagi shartlarda soliqdan ozod etiladi:

Muzey buyumlari xayriyasi

Muzey Milliy meros kengashi (MMK) tomonidan tasdiqlangan muzey statusiga ega bo'lgan. Muzey buyumi MMK tomonidan yig'ishga loyiq deb topilgan. 2006-yil 1-apreldan boshlab kompaniyalar yoki jismoniy shaxslar tomonidan jamoat ko'rishuvi uchun Milliy meros kengashi (MMK) yoki uning tasdiqlangan oluvchilariga haykal yoki san'at asarlarini xayriya qilish soliqdan ozod qilinadi.

Yer va bino xayriyasi

Kompaniyalar ham, jismoniy shaxslar ham yer va binolarni IXTga xayriya qilsa, ushbu summalar soliq solishdan ozod qilinadi.

Xayriya obyekti	Tasdiqlangan oluvchi	Kimlarga qo'llanadi
Pul mablag'lari	Tasdiqlangan IXTlar	Kompaniyalar va jismoniy shaxslar
Aksiyalar	Tasdiqlangan IXTlar	Faqat jismoniy shaxslar
Muzey buyumlari	Tasdiqlangan muzeylar (Milliy meros kengashi tomonidan)	Kompaniyalar va jismoniy shaxslar
Jamoat yodgorliklari	Milliy meros kengashi yoki tasdiqlangan oluvchilar tomonidan	Kompaniyalar va jismoniy shaxslar
Yer va bino	Tasdiqlangan IXTlar	Kompaniyalar va jismoniy shaxslar

Xayriya summolari 2026-yil 31-dekabrga qadar 2,5 koef-fitsiyentda soliq bazasidan chegirilishi belgilangan. Foydalanilmagan xayriya summolari kelgusi besh yilga o'tkazilishi mumkin.

Keling, ushbu mavzuga oid masala ishlab ko'ramiz. Quyidagi xayriyalar janob Yang tomonidan tasdiqlangan jamoat institutlariga quyidagi sanalarda qilingan:

Sana	Xayriya obyekti	Xayriya miqdori (dollar)
15.10.2016	Jamiyat fondiga pul mablag'lari	2000
02.05.2017	Bolalar jamiyatiga oziq-ovqat	3000
25.06.2017	Tadqiqot institutiga kompyuter	3600
10.11.2017	Milliy muzeyga muzey buyumlari	4000
02.03.2018	Jamiyat fondiga pul mablag'lari	5000

2017-yil uchun janob Yang uchun soliqdan ozod etiladigan xayriya summasini hisoblang.

Yechish:

Sana	Xayriya obyekti	Xayriya miqdori (dollar)	Izoh
15.10.2016	Jamiyat fondiga pul mablag'lari	2000	Qo'llanmaydi. Chunki 2016-yilga tegishli

02.05.2017	Bolalar jamiyatiga oziq-ovqat	3000	Qo'llanmaydi. Chunki oziq-ovqat xayriyasi uchun soliqdan ozod etish mavjud emas
25.06.2017	Tadqiqot institutiga kompyuter	3600	Qo'llanmaydi. Chunki kompyuter xayriyasi uchun soliqdan ozod etish mavjud emas
10.11.2017	Milliy muzeyga muzey buyumlari	4000	Qo'llanadi. 2,5 koeffitsiyentga ko'paytiriladi. Soliqdan ozod etiladigan summa 10 000 dollarni tashkil qiladi.
02.03.2018	Jamiyat fondiga pul mablag'lari	5000	Qo'llanmaydi. Chunki 2018-yilga tegishli.

2.3.9. IMTIYOZLAR

Singapurda jismoniy shaxslar uchun juda ko'p imtiyoz turlari mavjud emas. Lekin samarali va adolatni ta'minlashga qaratilgan. Quyida ularning turlarini ko'rsatib o'tamiz. Barcha imtiyozlar faqat Singapur rezidentlariga nisbatan qo'llanadi. Ko'pchilik imtiyozlar qat'iy summada oddiy soliq to'lovchi va nogiron soliq to'lovchi uchun chegirmalar tarzida beriladi. Quyidagi imtiyozlar bo'yicha ko'rsatilgan summalar yillik asosda Singapur dollarida aks ettiriladi.

1. Faol daromad ishlab topish imtiyozi

O'z-o'zini band qilish yoki yollanib ishlashni shunchaki ijara yoki kompaniyadan dividend, qarz instrumentidan foiz olishdan ko'ra ustunroq qilish va pensiya yoshi arafasidagi soliq to'lovchilarni mehnatga rag'batlantirish maqsadida ushbu imtiyoz beriladi. Imtiyoz summasi soliq to'lovchining yoshiga va sog'liq darajasiga bog'liq.

Odatdagi soliq to'lovchilar uchun:	Nogiron soliq to'lovchilar uchun:
55 yoshgacha bo'lgan soliq to'lovchi faol ishlab topgan daromadining 1000 dollargacha bo'lgan qismiga, 55–59 yoshdagi soliq to'lovchilar 6000 dollargacha bo'lgan qismiga, 60 yosh va undan yuqori bo'lgan soliq to'lovchilar uchun 8000 dollargacha bo'lgan qismiga beriladi. Agar faol ishlab topgan daromadi imtiyoz summasidan kam bo'lsa, ishlab topgan daromad summasi olinadi.	55 yoshgacha bo'lgan soliq to'lovchi faol ishlab topgan daromadining 4000 dollargacha bo'lgan qismiga, 55–59 yoshdagi soliq to'lovchilar 10 000 dollargacha bo'lgan qismiga, 60 yosh va undan yuqori bo'lgan soliq to'lovchilar uchun 12 000 dollargacha bo'lgan qismiga beriladi. Agar faol ishlab topgan daromadi imtiyoz summasidan kam bo'lsa, ishlab topgan daromad summasi olinadi.

Imtiyoz summasini daromad solig'i hisoboti avtomatik shakllantiradi. Faqat nogironligi bo'lgan soliq to'lovchi birinchi marta ushbu imtiyozni qo'llashda soliq organiga ariza va tasdiqlovchi hujjat bilan elektron tarzda murojaat qiladi.

2. Turmush o'rtog'i uchun imtiyoz

Mazkur imtiyoz o'z turmush o'rtog'i bilan birga yashaydigan erkak va ayol soliq to'lovchilarga nisbatan qo'llanadi. Uning asosiy sharti, imtiyozni olish uchun soliq to'lovchining turmush o'rtog'ining yillik jami daromadi 8000 dollardan oshmasligi lozim. Mazkur shart agar soliq to'lovchining turmush o'rtog'i nogiron bo'lgan taqdirda qo'llanmaydi.

Imtiyoz summasi odatdagi soliq to'lovchi uchun 2000 dollar. Turmush o'rtog'i nogiron bo'lgan soliq to'lovchi uchun 5500 dollarni tashkil qiladi.

Misol. Janob Pakning yillik daromadi 35 000 dollar. Uning turmush o'rtog'i Yung xonim nogiron va Pakning qaramog'ida. Janob Pak yillik daromad solig'i hisobotida o'zining soliqqa tortiladigan daromadini 5500 dollarga kamaytirishga haqli.

Imtiyoz summasini daromad solig'i hisoboti avtomatik shakllantiradi. Faqat soliq to'lovchi birinchi marta ushbu imtiyozni qo'llashda soliq organiga tegishli shakldagi ariza orqali turmush o'rtog'ining ma'lumotlarini elektron tarzda xabar qiladi.

3. Harbiy xizmat uchun imtiyozlar

Singapurda harbiy xizmat 2 yilni tashkil etadi. Bu 18 yoshga yetgan barcha erkaklar uchun majburiy xizmat dasturi hisoblanadi. Operativ tayyor harbiy xizmatchilar rezervi tarkibiga 50 yoshgacha ofitserlar va 40 yoshgacha boshqa fuqarolar kiradi. Ushbu rezervdagi harbiy xizmatchilar har yili 40 kunlik treningdan o'tishi lozim.

Fuqaro o'zi harbiy treningda o'tgan yildagi daromadiga nisbatan daromad solig'i bo'yicha imtiyozga ega bo'ladi. Bu imtiyoz summasi oddiy askar uchun 3000 dollar, komandir uchun 5000 dollar. Yillik treningdan o'tmagan fuqaro ham bazaviy imtiyozga ega bo'lishi mumkin. Bu imtiyoz summasi oddiy askar uchun 1500 dollar, komandir uchun 3500 dollar.

Imtiyozga ega bo'lgan fuqaroning turmush o'rtog'i va ota-onasi ham imtiyozga ega bo'ladi. Bundan ushbu harbiy xizmatga borgan fuqaroni e'tirof etish ko'zda tutiladi. Ularning imtiyoz summasi 750 dollarni tashkil qiladi.

Masalan, janob Li o'tgan yili 40 kunlik harbiy tayyorgarlikdan o'tgan. U harbiylar rezervida oddiy askar hisoblanadi. Mazkur holatda ushbu yil uchun janob Li 3000 dollar, uning turmush o'rtog'i 750 dollar va ota-onasining har biri 750 dollardan imtiyozga ega bo'ladilar.

4. Keksa ota-onasiga g'amxo'rlik uchun imtiyoz

Mazkur imtiyoz keksalarni qadrlash, ota-onasiga g'amxo'rlik qiladigan farzandlarni e'tirof etish maqsadida beriladi. Quyidagi shartlar bir vaqtda bajarilgan taqdirda imtiyoz beriladi:

- Imtiyoz predmeti bo‘lgan tomon (ota yoki ona) 55 yosh yoki undan katta bo‘lishi;
- Imtiyoz predmeti bo‘lgan tomon (ota yoki ona) yillik daromadi 8000 dollardan ko‘p bo‘lmasligi;
- Imtiyoz predmeti bo‘lgan tomon (ota yoki ona) soliq to‘lovchi bilan yashashi yoki alohida yashagan taqdirda belgilangan miqdorda yordam ko‘rsatgan bo‘lishi.

Yuqoridagi shartlar bajarilgan taqdirda soliq to‘lovchiga, agar imtiyoz predmeti bo‘lgan tomon (ota yoki ona) bilan birga yashasa, har bir tomon uchun (ota va ona) yillik 9000 dollar imtiyozga, alohida yashagan taqdirda 5500 dollar imtiyozga ega bo‘ladi.

Agar soliq to‘lovchi o‘zining nogiron otasi yoki nogiron onasiga nisbatan soliq imtiyoziga ega bo‘lmoqchi bo‘lsa, ushbu tomonlarning yoshi yoki qancha daromad topishidan qat’i nazar, imtiyoz beriladi. Imtiyoz summasi nogiron otasi yoki nogiron onasi bilan birga istiqomat qiluvchi soliq to‘lovchi 14 000 dollar imtiyoz summasiga, alohida yashasa, lekin belgilangan tartibda yordam ko‘rsatsa, yillik 10 000 dollar imtiyozga ega bo‘ladi. Bir shaxs (ota yoki ona) uchun faqat bir farzand imtiyozga ega bo‘lishi mumkin.

5. Ishlovchi onalarga imtiyoz

Mazkur imtiyozning berilishidan maqsad turmushga chiqqan ayollarni farzandli bo‘lgandan keyin ham ishda qolishga undash, ota-onalarni farzandlarini Singapur fuqaroligini olishga undash, Singapur fuqarosi bo‘lgan bolalari bo‘lgan

oilalarni rag'batlantirish maqsadida ayollarga taqdim etiladi.

Mazkur imtiyozga ega bo'lish uchun ishlayotgan ayolning farzandi turmush qurmagan, yoshi 16 yoshga yetmagan yoki to'liq ta'lim olayotgan hamda ushbu farzand yillik jami daromadi 8000 dollardan oshmagan taqdirda qo'llanadi.

Imtiyoz summasi birinchi farzand uchun ayolning ishlab topgan daromadining (faol daromad) 15%, ikkinchi farzand uchun ishlab topgan daromadining (faol daromad) 20%, uchinchi va keyingi farzandlarning har biri uchun ishlab topilgan daromadning (faol daromad) 25% etib belgilangan.

6. Nogiron aka-uka yoki opa-singil uchun imtiyoz

Mazkur imtiyoz o'zining nogiron aka-ukasi yoki opa-singilisiga g'amxo'rlik qiladigan jismoniy shaxslarni qo'llab-quvvatlashga qaratilgan. Soliq to'lovchining yaqini nogiron bo'lgan va soliq to'lovchi bilan birga yashagan yoki soliq to'lovchi tomonidan yiliga kamida 2000 dollarlik qo'llab-quvvatlangan bo'lsa, soliq to'lovchi yillik daromadlarini 5500 dollarga kamaytirish bo'yicha imtiyozga ega bo'lishi mumkin.

Agar bir nogiron kishiga uning bir nechta yaqinlari yordam qilgan bo'lsa, umumiy imtiyoz summasi – 5500 dollar ular o'rtasida kelishilgan holda taqsimlanadi.

7. Farzandlarga g'amxo'rlik qilish bo'yicha imtiyoz

Ishlovchi ayollarning mehnat qilishda davom etishini qo'llab-quvvatlash uchun ularga ikki xil imtiyoz taqdim etilgan.

Birinchisi, agar ishlayotgan ayol soliq to'lovchining 12 yoshgacha farzandlari yoki yoshidan qat'i nazar nogiron farzandi mavjud bo'lgani holda ularga soliq to'lovchining otasi, bobo-buvisi, qaynata-qaynonasi qarab tursa hamda ularning daromadi 8000 dollardan oshmasa, imtiyoz qo'llanadi. Imtiyoz summasi soliq to'lovchiga 3000 dollarni tashkil qiladi. Farzandlarga soliq to'lovchining ham otasi, ham onasi qarab turgan bo'lsa-da, imtiyoz qo'llash summasi 3000 dollardan oshmaydi.

Ikkinchisi, agar ishlayotgan ayol soliq to'lovchi chet ellik uy ishchisini yollagan bo'lsa, ushbu ishchidan foydalanish uchun davlatga oylik yig'im to'lanadi. Soliq to'lovchi ana shu yig'imning yillik to'lovi ikki baravari miqdorida imtiyozga ega bo'ladi. Masalan, yosh farzandi bor oilalar uchun mazkur yig'im oyiga 60 dollarni tashkil etadi. Bunda imtiyoz summasi 1440 dollar ($60 \cdot 12 \cdot 2$)ni tashkil qiladi.

8. Malaka oshirish uchun imtiyoz

Mazkur imtiyoz soliq to'lovchi jismoniy shaxslarning o'z tajribalarini doimiy ravishda oshirib borish va ishga yollanishi oson bo'lishini ta'minlash uchun beriladi. Bunda malaka oshirish uchun sarflangan haqiqatdagi summalarining 5500 dollardan oshmaydigan qismi soliq bazasidan chegiriladi.

Mazkur imtiyozga ega bo'lish uchun o'tgan soliq yilida tegishli mezonlarga javob bergan, ya'ni ko'ngilochar kurslar yoki ishga yollanish uchun zarur bo'lmaydigan ko'nikmalar

uchun sarflangan summalardan iborat bo'lmagan sarflar summasiga tasdiqlovchi hujjatlar ilova qilinishi lozim.

9. Markaziy pensiya fondiga to'lov bo'yicha imtiyoz

Xodimning o'z uchun

Mazkur imtiyoz Singapur pensiya to'g'risidagi qonuniga asosan xodimlar tomonidan majburiy to'lanadigan summalarga nisbatan qo'llanadi. Bundan ko'zlangan maqsad insonlarni o'z mablag'larini jamg'arishga rag'batlantirish hisoblanadi.

Pensiya fondiga to'lanadigan to'lov summasi ish haqining (bazaviy va boshqa mukofotlar) 20% ni tashkil qiladi. Imtiyozning maksimal summasi 37 740 dollarga yetadi.

Xodim o'z yaqinlariga to'lagan taqdirda

O'z oila a'zolarining pensiyasi yetishmayotgan taqdirda soliq to'lovchi ular uchun ham Markaziy pensiya fondiga to'lovlarni amalga oshirishi mumkin. Bunda ota-onasi, bo-bo-buvisi va nogiron turmush o'rtog'i yoki nogiron aka-ukasi uchun to'lovni amalga oshirgan taqdirda imtiyozni qo'llash bo'yicha boshqa shartlar mavjud emas.

Turmush o'rtog'i va aka-ukasi uchun to'lovni amalga oshirgan bo'lsa-yu ularning daromadi 8000 dollardan yuqori bo'lsa, soliq to'lovchi mazkur imtiyozdan foydalana olmaydi. Mazkur imtiyozning maksimal summasi 2023-yildan boshlab 8000 dollarga teng (2022-yilgacha 7000 dollar bo'lgan).

10. Hayot sug'urtasi uchun imtiyoz

Hayotni sug'urtalash bo'yicha imtiyoz o'z hayot sug'urtasi polislari bo'yicha yillik sug'urta mukofotlarini to'lagan shaxslarga beriladi. Mazkur imtiyozga ega bo'lish uchun bir qancha shartlar bajarilishi kerak:

- Hayot sug'urtasi uchun pul to'langan bo'lishi;
- Sug'urta kompaniyasi Singapurga tegishli bo'lishi;
- Pensiya fondiga majburiy to'lovlari 5000 dollardan kam bo'lishi.

Ushbu mezonlar bajarilgan taqdirda soliq to'lovchi imtiyozga ega bo'lishi mumkin. Imtiyoz summasi quyidagi uchta ko'rsatkich orqali aniqlanadi:

- 5000 dollar minus Pensiya Fondiga majburiy to'lovlar;
- Hayotni sug'urta qildirish qiymatining 7%;
- Yillik to'langan sug'urta mukofoti summasi.

Masalan, Janob Lim o'z hayotini sug'urta qildirgan. Sug'urta qilingan qiymat 50 000 dollar. 2023-yilda to'lagan sug'urta mukofoti summasi 3800 dollar. Pensiya fondiga majburiy to'lovi 1600 dollar. Hayot sug'urtasi uchun imtiyozni hisoblang.

Janob Lim uchun yuqoridagi uchta ko'rsatkichni hisoblaymiz. Birinchisi 3400 dollar ($5000 - 1600$). Ikkinchisi 3500 dollar ($50000 \cdot 7\%$). Uchinchisi 3800 dollar (masala shartiga ko'ra berilgan). Ushbu uchta ko'rsatkichdan kichigi 3400 dollar imtiyoz summasi hisoblanadi.

11. Farzandlar uchun imtiyoz

Mazkur imtiyoz ota-onalarga bolalarini qo'llab-quvvatlash sa'y-harakatlarini e'tirof etish uchun beriladi. Ya'ni tejab qolingan pullar bolalarga g'amxo'rlik qilishga rag'bat berish maqsadida kiritilgan. Imtiyozni olish uchun farzand o'ziga tegishli yoki qonuniy tarzda asrab olingan, yoshi 16 yoshdan kichik yoki 16 yosh va undan katta bo'lib, yil davomida har qanday vaqtda universitet, kollej yoki boshqa ta'lim muassasasida to'liq vaqtli tahsil olayotgan bo'lsa, mazkur imtiyoz qo'llanadi. Bunda imtiyoz summasi har bir farzand uchun 4000 dollar, nogironligi bor farzand uchun esa 7500 dollarni tashkil qiladi. Mazkur imtiyoz ota yoki onadan qaysi biri birinchi ariza bersa, shu tomonga qo'llanadi.

Soliq imtiyozlarining maksimal summasi

Bir jismoniy shaxs uchun maksimal qo'llanadigan imtiyoz summasi yiliga 80 000 dollardan oshmasligi lozim.

2.3.10. SOLIQ SUMMASIGA CHEGIRMALAR

Singapurda yuqorida ko'rsatilgan soliq imtiyozlaridan tashqari soliq summasiga chegirmalar ham mavjud. Ikki xil soliq chegirmasi bor. Birinchisi – shaxsiy soliq chegirmasi, ikkinchisi – farzandli bo'lgani uchun soliq chegirmasi.

Shaxsiy soliq chegirmasi

Mazkur chegirma Singapur soliq rezidentlari uchun avtomatik tarzda hisoblanadi. Uning miqdori to'lanadigan soliq summasining 50%, lekin 200 dollardan oshmasligi kerak. Masalan, janob Teo uchun 2023-yilda hisoblangan JShDS summasi 500 dollar bo'lsa, shaxsiy soliq chegirmasi 200 dollarni ($500 \cdot 50\%$ va 200 dollardan kichigi) tashkil qiladi. Natijada janob Teo byudjetga 300 dollar soliq to'laydi.

Farzandli bo'lgani uchun soliq chegirmasi

Mazkur chegirma bir farzand uchun soliq to'lovchiga bir marta beriladigan chegirma hisoblanadi. Ushbu chegirma-ning summasi birinchi farzand uchun 5000 dollar, ikkinchi farzand uchun 10 000 dollar, uchinchi farzanddan boshlab har bir farzand uchun 20 000 dollarni tashkil qiladi. Ushbu summa soliq to'lovchi bo'lgan ota-ona o'rtasida ixtiyoriy ravishda taqsimlanishi mumkin. Chegirmadan joriy soliq yilida foydalanilmagan taqdirda keyingi yilga o'tkaziladi.

Bu farzandli bo'lgan fuqarolarni rag'batlantirishning innovatsion usuli deyish mumkin. Chunki bunday mukofotni byudjetdan davlat organi to'lamaydi, aksincha, soliq to'lovchi ushbu summani soliqdan tejab qoladi.

2.3.11. SOLIQ HISOBOTINI TOPSHIRISH VA TO‘LASH

Jismoniy shaxslar yilda bir marta o‘z daromadlari bo‘yicha hisobot topshirishi kerak. Umuman olganda, oldingi kalendar yilida quyidagi holatlardan biri sodir bo‘lgan bo‘lsa, jismoniy shaxs daromad solig‘i hisobotini taqdim etishi talab qilinadi:

- Umumiy daromadi 22 000 dollardan ortiq bo‘lgan;
- Sof foydasi 6000 dollardan ortiq bo‘lgan biznes daromadi mavjud;
- Singapurdan daromad olgan norezident shaxs bo‘lsa.

Bundan tashqari, ish beruvchilar xodimlarning ish haqi tarzidagi daromadlar bo‘yicha avtomatik hisob berish tizimi orqali soliq organiga har yili 1-martga qadar ma’lumot yuboradi. Ushbu ma’lumotlar jismoniy shaxsning daromad solig‘i hisobotida avtomatik tarzda aks etadi. Daromad solig‘i to‘lovi hisobot topshirilgandan so‘ng 12 oyga bo‘lib to‘lanishi mumkin.

2.3.12. DAROMAD SOLIG'INI HISOBLASH BO'YICHA MASALA

Ralf Tan so'nggi 20 yil davomida Future Generations Pte Ltd kompaniyasida bosh direktor sifatida ishlab kelmoqda. U kompaniyada 20 yillik xizmati uchun Rolex tilla soatini mukofot sifatida olgan. Soatning qiymati 20 000 dollar. Uning rafiqasi Rubi Li o'z do'sti Tobi bilan birgalikda «Cookies Village» nomli uy pishiriqlarini tayyorlash biznesiga sherikchilik asosida egalik qiladi. Yil uchun sherikchilikning sof taqsimlanuvchi foydasi 205 000 dollarni tashkil etdi. Biznesda soliq idorasi bilan kelishilgan oldingi yillarning 5200 dollarlik kapital chegirmalari mavjud. Sherikchilik ulushi Rubiga 70% va Tobiga 30% tarzida taqsimlanadi.

Ikkovida uch bola bor. Lili 20 yoshda bo'lib, hozirda Nyu-Yorkda biznes sohasida bakalavr darajasini olish uchun tahsil olmoqda. Rozi 13 yoshda bo'lib, hozirda Udemy o'rta maktabida o'qimoqda. Kenjatoy Lotus 9 yoshda bo'lib, boshlang'ich maktabga qatnaydi. Oila Ralfning onasi bilan yashaydi va uni boqadi. U 75 yoshda bo'lib, shuningdek, juftlik ishda bo'lgan vaqtda Rozi va Lotusga qarashga yordam beradi. Ralf o'sha uyda yashayotgan nogiron singlisini ham boqadi. 2020-yildan beri uy xizmatchisi ro'zg'orga yordam berib kelmoqda.

Rubi biznes uchun fransuz tortlari bo'yicha onlayn oshpazlik kursiga qatnashgan. Jami kurs to'lovi 2500 dollarni tashkil etgan. Ralfning ATA Insurance kompaniyasidan hayot sug'urtasi polisi bor. Yillik badal 3600 dollar. Rubining hayot

sug'urtasi polisi CGA Insurance bilan. Yillik badal 2000 dollar.

2024-yil dekabrda Future Generations Pte Ltd Ralf va Rubining Nyu-Yorkka Lilining oldiga borib kelishi uchun aviachipta pulini homiylik qilib to'lagan. Chiptalarning qiymati 12 700 dollar deb baholangan. Ralf harbiylik chegirmasini talab qilishga haqli emas.

Quyidagi tafsilotlar 2024-yili uchun Ralf va Rubining daromadi va boshqa ma'lumotlariga taalluqlidir:

	Ralf	Rubi
Tug'ilgan yili	1960	1972
	\$	\$
Maosh	450 000	
Bonus	100 000	
Direktor haqi:		
Future Generations Consultancy Pte Ltd 31.12.2023 da tugagan moliyaviy yil uchun 30.06.2024 da tasdiqlangan	50 000	
Dividendlar:		
Gold Bullion Ltd	850	
Haidilao Ltd		2100
Foizlar:		
OCBC	770	
UOB		1350
Qonuniy pensiya badallari	20 400	6120
Xayriyalar:		
Club Oasis – eski o'yinchoqlar		300
IXT – muzey	3000	
IXT – sog'lomlashtirish markazi		1500
Sof ijara daromadi		
UMF Tower	32 000	
Silk road Building	32 250	32 250

Ushbu jismoniy shaxslarga daromad solig'ini hisoblang.

Yechish:

	Ralf	Rubi
Tug'ilgan yili	1960	1972
	\$	\$
Maosh	450 000	
Bonus	100 000	
Direktor haqi	50 000	
Bilet narxi (Nyu-York)	12 700	
Sovg'a (tilla soat)	20 000	
Savdo foydasi – Cookies Village		143 500
Dividendlar:		
Gold Bullion Ltd	0	
Haidilao Ltd		0
Foizlar:		
OCBC	0	
UOB		0
Sof ijara daromadi		
UMF Tower	32 000	
Silk road Building	32 250	32 250
Minus: kapital chegirmalar		(3640)
Jami daromad	696 950	172 110
Xayriyalar:		
Club Oasis – eski o'yinchoqlar		0
IXT – muzey	7500	
IXT – sog'lomlashtirish markazi		3750
Baholanadigan daromad	689 450	168 360
Soliq imtiyozlari		
Faol daromad topish imtiyozi	8000	1000
Farzandlar uchun imtiyoz		
Lili	4000	

Rozi	4000	
Lotus	4000	
Ishlayotgan ona uchun imtiyoz		
Lili		20 979
Rozi		27 972
Lotus		34 965
Bobo/buvining bolalarga qarab turishi imtiyozi		3000
Nogiron aka-singil uchun imtiyoz	5500	
Uy yordamchisi uchun imtiyoz		1440
Malaka oshirish uchun imtiyoz		2500
Qonuniy pensiya badallari	20 400	6120
Keksa ota-onasiga g'amxo'rlik uchun imtiyoz	9000	
Jami imtiyozlar	54 900	97 976
Maksimal imtiyoz summasi		80 000
Soliq solinadigan foyda	634 550	88 360
Dastlabki 500 000 dollardan	84 150	
Keyingi 134 550 dollardan 23%	30 946	
Dastlabki 80 000 dollardan		3350
Keyingi 8360 dollardan 11,5%		961
Jami to'lanadigan soliq	115 096	4311

2.4. Mulk solig'i

Singapurda mulkka ega bo'lish shunchaki uy yoki ofisga ega bo'lishni anglatmaydi. Bu davlatning rivojlanishi va barqarorligiga hissa qo'shish mas'uliyatini ham yuklaydi. Mulk solig'i aynan shu mas'uliyatning moliyaviy ifodasidir.

Mulk solig'i Singapurda «boylik solig'i» deb ataladi. Bu daromad solig'idan tubdan farq qiladi. Daromad solig'i qancha pul topganingizga solinsa, mulk solig'i qancha mulkka ega ekaningizga solinadi. Ya'ni mulkingiz bo'sh tursa, ijaraga bersangiz yoki o'zingiz yashasangiz, baribir soliq to'lashingiz kerak.

Bu soliqdan to'plangan mablag'lar qayerga sarflanadi? Bolalar ta'limi, kasalxonalar, parklar, yo'llar – barcha ijtimoiy inf-ratuzilma aynan mulk solig'i kabi soliqlardan moliyalashtiriladi.

Singapur mustaqillikka erishgan ilk kunlaridanoq mulk solig'i tizimini joriy qilgan. Sababi, Singapur kichik va cheklangan resurslarga ega davlat sifatida har bir dollar daromadini oqilona va adolatli tarzda jamlashi kerak edi. Mulk solig'i tizimi bir necha muhim maqsadlarga xizmat qiladi:

- Birinchidan, u davlat byudjetining barqaror manbaidir. Mulk harakatchan emas, uni yashirib yoki boshqa davlatga ko'chirib bo'lmaydi;

- Ikkinchidan, u tengsizlikni kamaytirish vositasi bo'lib xizmat qiladi. Qimmatroq mulkka ega bo'lganlar ko'proq soliq to'laydilar, bu adolatli taqsimotni ta'minlaydi;

– Uchinchidan, bu mulk spekulyatsiyasini cheklaydi. Investitsiya maqsadida mulk sotib oluvchilar ko‘proq soliq to‘laydilar, bu mulk narxlarini nazorat ostida ushlashga yordam beradi.

2.4.1. Mulk solig‘ini hisoblash mexanizmi

Mulk solig‘ini hisoblash juda oddiy: Yillik qiymat $\times$ Soliq stavkasi

Lekin bu oddiy formula ortida murakkab va puxta ishlab chiqilgan tizim yotadi. Keling, har bir elementni batafsil ko‘rib chiqaylik.

Yillik qiymat (Annual Value) nima?

Yillik qiymat mulk ijaraga berilsa, yiliga qancha pul topish mumkinligining taxminiy hisobidir. Lekin bu haqiqiy ijara haqi emas, balki SSO tomonidan hisoblangan standart qiymatdir.

Yillik qiymatga quyidagilar kirmaydi:

- Mebel va jihozlar qiymati;
- Texnik xizmat ko‘rsatish to‘lovlari;
- Kommunal to‘lovlar.

Misol uchun, agar sizning kvartirangiz haqiqatda oyiga 1000 dollardan ijaraga berilayotgan bo‘lsa, lekin bu narx ichida 200 dollar mebel va 100 dollar texnik xizmat uchun bo‘lsa, u holda yillik qiymat hisoblashda faqat $700 \times 12 = 8400$ dollar hisobga olinadi.

SSO mutaxassislari har yili barcha mulklarning yillik qiymatini ko‘rib chiqadilar. Ular quyidagi uslubdan foydalanadilar:

1. O'xshash mulklar tahlili. Agar mulk Toada joylashgan 3 xonalik kvartira bo'lsa, SSO shu hududdagi barcha o'xshash kvartiralarning ijara narxlarini yig'adi va tahlil qiladi.

2. Jismoniy xususiyatlarni solishtirish. Kvartiraning o'lchami (kvadrat metr), qavat (yuqori qavatlar odatda qimmatroq), ta'mirlash holati, ko'rinish (dengiz yoki parkka qaragan kvartiralar qimmatroq), transportning qulayligi kabilar.

3. Bozor tendensiyalarini hisobga olish. Bozorda ijara narxlari oshsa, yillik qiymat ham oshadi. Aksincha, narxlar tushsa, yillik qiymat ham kamayadi.

2.4.2. 2025-YILDAGI O'ZGARISHLAR

2025-yil Singapur mulk solig'i tarixida muhim yil bo'ldi. Hukumat keng qamrovli islohotlarni amalga oshirdi, bu islohotlar millionlab mulk egalariga bevosita ta'sir ko'rsatdi.

Egasi yashaydigan mulklar uchun yangi stavkalar

2025-yil 1-yanvardan e'tiboran egasi yashaydigan turarjoy mulklari uchun quyidagi stavkalar amal qiladi:

– **Birinchi 12 000 dollar – 0%.** Bu shuni anglatadiki, yillik qiymati 12 000 dollar yoki undan kamroq bo'lgan har qanday mulk umuman mulk solig'i to'lamaydi. Bu barcha 1 xonalik va 2 xonalik kvartiralarini qamrab oladi;

– **12 001 dollardan 36 000 dollargacha – 4%.** Agar yillik qiymati 24 000 dollar bo'lsa, faqat 12 000 dollardan ortiq qism uchun soliq to'lanadi: $(24\,000 - 12\,000) \times 4\% = 480$ dollar yiliga;

– **36 000 dollardan yuqori – progressiv stavkalar.** Yuqori qiymatli mulklar uchun stavka bosqichma-bosqich 32% gacha yetadi.

Egasi yashamaydigan mulklar uchun stavkalar

Investitsiya mulklari yoki ijaraga berilgan mulklarga ancha yuqori stavkalar qo'llanadi:

- Birinchi 30 000 dollar – 12%;
- 30 001–36 000 dollar – 20%;
- 36 000 dollardan yuqori – 36% gacha.



Bu stavkalar ataylab yuqori qilingan. Maqsad haqiqiy uy egalarini qo'llab-quvvatlash va mulk spekulyatsiyasini cheklashdir. O'zbekistonda ijaraga berilgan uylar va o'zlari yashaydigan uylar uchun mol-mulk solig'i bir xil stavkada to'lanadi.

2.4.3. To'lov tartibi va usullari

Mulk solig'ini to'lash yillik majburiyat hisoblanadi. Har yili dekabr oyi oxirida keyingi yil uchun mulk solig'i hisobini olasiz. To'lov muddati odatda 31-yanvar yoki hisobingizda ko'rsatilgan sanadir. Agar muddatida to'lanmasa, 5% jarima solinadi. Bu jarima faqat kechikkan summa uchun emas, balki butun soliq summasi uchun hisoblanadi. Shuning uchun vaqtida to'lash juda muhim.

O'zbekiston va Singapur soliq tizimlarining farqini tushunish qaror qabul qiluvchilarda yangi qarashlar, yangi fikrlar tug'ilishiga sabab bo'ladi deb ishonamiz. Shu maqsadda ushbu ikki tizimning bir-biridan asosiy farqlarini jadval tarzida taqdim etamiz. Tizimlarni aynan soliq siyosati tarafidan solishtiramiz.